

## 2 Kurinthyon

<sup>1</sup> Yih khat Paulus kī taraf se hai, jo Allāh kī marzī se Masīh Īsā kā rasūl hai. Sāth hī yih bhāi Tīmuthiyus kī taraf se bhī hai.

Main Kurinthus meñ Allāh kī jamāt aur sūbā Akhayā meñ maujūd tamām muqaddasīn ko yih likh rahā hūn.

<sup>2</sup> Kḥudā hamārā Bāp aur Kḥudāwand Īsā Masīh āp ko fazl aur salāmatī atā karen.

### *Allāh kī Hamd-o-Sanā*

<sup>3</sup> Hamāre Kḥudāwand Īsā Masīh ke Kḥudā aur Bāp kī tamjīd ho, jo rahm kā Bāp aur tamām tarah kī tasallī kā Kḥudā hai. <sup>4</sup> Jab bhī ham musibat meñ phaṅs jāte haiñ to wuh hameñ tasallī detā hai tāki ham auroñ ko bhī tasallī de sakeñ. Phir jab wuh kisī musibat se dochār hote haiñ to ham bhī un ko usī tarah tasallī de sakte haiñ jis tarah Allāh ne hameñ tasallī dī hai.

<sup>5</sup> Kyoñki jitnī kasrat se Masīh kī-sī musibateñ ham par ā jāti haiñ utnī kasrat se Allāh Masīh ke zariye hameñ tasallī detā hai. <sup>6</sup> Jab ham musibaton se dochār hote haiñ to yih bāt āp kī tasallī aur najāt kā bāis bantī hai. Jab hamārī tasallī hotī hai to yih āp kī bhī tasallī kā bāis bantī hai. Yoñ āp bhī sabar se wuh kuchh bardāsht karne ke qābil ban jāte haiñ jo ham bardāsht kar rahe haiñ. <sup>7</sup> Chunāñche hamārī āp ke bāre meñ ummīd puḳhtā rahtī hai. Kyoñki ham jānte haiñ ki jis tarah āp hamārī musibaton

meñ sharīk haiñ usī tarah āp us tasallī meñ bhī sharīk haiñ jo hameñ hāsīl hotī hai.

<sup>8</sup> Bhāiyo, ham āp ko us musībat se āgāh karnā chāhte haiñ jis meñ ham sūbā Āsiyā meñ phañs gae. Ham par dabāw itnā shadīd thā ki use bardāsht karnā nāmumkin-sā ho gayā aur ham jān se hāth dho baiṭhe. <sup>9</sup> Ham ne mahsūs kiyā ki hameñ sazā-e-maut dī gai hai. Lekin yih is lie huā tāki ham apne āp par bharosā na karen balki Allāh par jo murdoñ ko zindā kar detā hai. <sup>10</sup> Usī ne hameñ aisī haibatnāk maut se bachāyā aur wuh āindā bhī hameñ bachāegā. Aur ham ne us par ummīd rakhī hai ki wuh hameñ ek bār phir bachāegā. <sup>11</sup> Āp bhī apnī duāoñ se hamārī madad kar rahe haiñ. Yih kitnī ḳhūbsūrat bāt hai ki Allāh bahutoñ kī duāoñ ko sun kar ham par mehrbānī karegā aur natīje meñ bahutere hamāre lie shukr karenge.

### *Paulus ke Mansūboñ meñ Tabdīlī*

<sup>12</sup> Yih bāt hamāre lie faḳhr kā bāis hai ki hamārā zamīr sāf hai. Kyoñki ham ne Allāh ke sāmne sādādilī aur ḳhulūs se zindagī guzārī hai, aur ham ne apnī insānī hikmat par inhisār nahīn kiyā balki Allāh ke fazl par. Duniyā meñ aur ḳhāskar āp ke sāth hamārā rawaiyā aisā hī rahā hai. <sup>13</sup> Ham to āp ko aisī koī bāt nahīn likhte jo āp parḥ yā samajh nahīn sakte. Aur mujhe ummīd hai ki āp ko pūre taur par samajh āegī, <sup>14</sup> agarche āp filhāl sab kuchh nahīn samajhte. Kyoñki jab āp ko sab kuchh samajh āegā tab āp Ḳhudāwand Īsā ke din ham par utnā faḳhr kar sakeñge jitnā ham āp par.

15 Chūnki mujhe is kā pūrā yaqīn thā is lie main pahle āp ke pās ānā chāhtā thā tāki āp ko dugnī barkat mil jāe. 16 Ḳhayāl yih thā ki main āp ke hān se ho kar Makiduniyā jāūn aur wahān se āp ke pās wāpas āūn. Phir āp sūbā Yahūdiyā ke safr ke lie taiyāriyān karne mein merī madad karke mujhe āge bhej sakte the. 17 Āp mujhe batāen ki kyā main ne yih mansūbā yoñ hī banāyā thā? Kyā main duniyāwī logoñ kī tarah mansūbe banā letā hūn jo ek hī lamhe mein “Jī hān” aur “Jī nahīn” kahte haiñ? 18 Lekin Allāh wafādār hai aur wuh merā gawāh hai ki ham āp ke sāth bāt karte waqt “Nahīn” ko “Hān” ke sāth nahīn milāte. 19 Kyoñki Allāh kā Farzand Īsā Masīh jis kī munādī main, Silās aur Tīmuthiyus ne kī wuh bhī aisā nahīn hai. Us ne kabhī bhī “Hān” ko “Nahīn” ke sāth nahīn milāyā balki us mein Allāh kī hatmī “Jī hān” wujūd mein āi. 20 Kyoñki wuhī Allāh ke tamām wādoñ kī “Hān” hai. Is lie ham usī ke wasīle se “Āmīn” (Jī hān) kah kar Allāh ko jalāl dete haiñ. 21 Aur Allāh ḳhud hameñ aur āp ko Masīh mein mazbūt kar detā hai. Usī ne hameñ masah karke maḳhsūs kiyā hai. 22 Usī ne ham par apnī muhr lagā kar zāhir kiyā hai ki ham us kī milkiyat haiñ aur usī ne hameñ Rūhul-quds de kar apne wādoñ kā bayānā adā kiyā hai.

23 Agar main jhūṭ bolūn to Allāh mere ḳhilāf gawāhī de. Bāt yih hai ki main āp ko bachāne ke lie Kurinthus wāpas na āyā. 24 Matlab yih nahīn ki ham īmān ke muāmale mein āp par hukūmat karnā chāhte haiñ. Nahīn, ham āp ke sāth mil kar ḳhidmat karte haiñ tāki āp ḳhushī se bhar

jāeñ, kyoñki āp to īmān kī mārifat qāym haiñ.

## 2

<sup>1</sup> Chunānche mainē ne faislā kiyā ki mainē dubārā āp ke pās nahīn āūngā, warnā āp ko bahut ḡham khānā paṛegā. <sup>2</sup> Kyoñki agar mainē āp ko dukh pahuñchāūñ to kaun mujhe ḡhush karegā? Yih wuh shaḡhs nahīn karegā jise mainē ne dukh pahuñchāyā hai. <sup>3</sup> Yihī wajah hai ki mainē ne āp ko yih likh diyā. Mainē nahīn chāhtā thā ki āp ke pās ā kar unhīn logoñ se ḡham khāūñ jinheñ mujhe ḡhush karnā chāhie. Kyoñki mujhe āp sab ke bāre meñ yaqīn hai ki merī ḡhushī āp sab kī ḡhushī hai. <sup>4</sup> Mainē ne āp ko nihāyat ranjīdā aur pareshān hālat meñ ānsū bahā bahā kar likh diyā. Maqsad yih nahīn thā ki āp ḡhamgīn ho jāeñ balki mainē chāhtā thā ki āp jān leñ ki mainē āp se kitnī gahrī muhabbat rakhtā hūñ.

### *Mujrim ko Muāf Kar Diyā Jāe*

<sup>5</sup> Agar kisī ne dukh pahuñchāyā hai to mujhe nahīn balki kisī had tak āp sab ko. (Mainē zyādā saḡhtī se bāt nahīn karnā chāhtā.) <sup>6</sup> Lekin māzkūrā shaḡhs ke lie yih kāfī hai ki use jamāt ke aksar logoñ ne sazā dī hai. <sup>7</sup> Ab zarūrī hai ki āp use muāf karke tasallī deñ, warnā wuh ḡham khā khā kar tabāh ho jāegā. <sup>8</sup> Chunānche mainē is par zor denā chāhtā hūñ ki āp use apnī muhabbat kā ehsās dilāeñ. <sup>9</sup> Mainē ne yih mālūm karne ke lie āp ko likhā ki kyā āp imtihān meñ pūre utreñge aur har bāt meñ tābe raheñge. <sup>10</sup> Jise āp kuchh muāf karte haiñ use mainē bhī

muāf kartā hūn. Aur jo kuchh main ne muāf kiyā, agar mujhe kuchh muāf karne kī zarūrat thī, wuh main ne āp kī k̄hātir Masīh ke huzūr muāf kiyā hai <sup>11</sup> tāki Iblīs ham se faydā na uṭhāe. Kyonki ham us kī chāloñ se k̄hūb wāqif haiñ.

### *Troās meñ Paulus kī Pareshānī*

<sup>12</sup> Jab main Masīh kī k̄hushkhabrī sunāne ke lie Troās gayā to K̄hudāwand ne mere lie āge k̄hidmat karne kā ek darwāzā khol diyā. <sup>13</sup> Lekin jab mujhe apnā bhāī Titus wahāñ na milā to main bechain ho gayā aur unheñ k̄hairbād kah kar sūbā Makiduniyā chalā gayā.

### *Masīh meñ Fatah*

<sup>14</sup> Lekin K̄hudā kā shukr hai! Wuhī hamāre āge āge chāltā hai aur ham Masīh ke qaidī ban kar us kī fatah manāte hue us ke pīchhe pīchhe chalte haiñ. Yoñ Allāh hamāre wasīle se har jagah Masīh ke bāre meñ ilm k̄hushbū kī tarah phailātā hai. <sup>15</sup> Kyonki ham Masīh kī k̄hushbū haiñ jo Allāh tak pahuñchtī hai aur sāth sāth logon meñ bhī phailtī hai, najāt pāne wāloñ meñ bhī aur halāk hone wāloñ meñ bhī. <sup>16</sup> Bāz logon ke lie ham maut kī mohlak bū haiñ jabki bāz ke lie ham zindagībaḡhsh k̄hushbū haiñ. To kaun yih zimmedārī nibhāne ke lāyq hai? <sup>17</sup> Kyonki ham aksar logon kī tarah Allāh ke kalām kī tijārat nahīn karte, balki yih jān kar ki ham Allāh ke huzūr meñ haiñ aur us ke bheje hue haiñ ham k̄hulūdīlī se logon se bāt karte haiñ.

## 3

### *Nae Ahd ke K̄hādim*

<sup>1</sup> Kyā ham dubārā apnī kḥūbiyon kā dhandorā pīt rahe haiñ? Yā kyā ham bāz logon kī mānind haiñ jinheñ āp ko sifārishī khat dene yā āp se aise khat likhwāne kī zarūrat hotī hai? <sup>2</sup> Nahīn, āp to kḥud hamārā khat haiñ jo hamāre dilon par likhā huā hai. Sab ise pahchān aur parḥ sakte haiñ. <sup>3</sup> Yih sāf zāhir hai ki āp Masīh kā khat haiñ jo us ne hamārī kḥidmat ke zariye likh diyā hai. Aur yih khat siyāhī se nahīn balki zindā Kḥudā ke Rūh se likhā gayā, patthar kī taḥhtiyon par nahīn balki insānī dilon par.

<sup>4</sup> Ham yih is lie yaqīn se kah sakte haiñ kyonki ham Masīh ke wasīle se Allāh par etamād rakhte haiñ. <sup>5</sup> Hamāre andar to kuchh nahīn hai jis kī binā par ham dāwā kar sakte ki ham yih kām karne ke lāyq haiñ. Nahīn, hamārī liyāqat Allāh kī taraf se hai. <sup>6</sup> Usī ne hameñ nae ahd ke khādim hone ke lāyq banā diyā hai. Aur yih ahd likhī huī sharīat par mabnī nahīn hai balki Rūh par, kyonki likhī huī sharīat ke asar se ham mar jāte haiñ jabki Rūh hameñ zindā kar detā hai.

<sup>7</sup> Sharīat ke hurūf patthar kī taḥhtiyon par kandā kie gae aur jab use diyā gayā to Allāh kā jalāl zāhir huā. Yih jalāl itnā tez thā ki Isrāīlī Mūsā ke chehre ko lagātār dekh na sake. Agar us chīz kā jalāl itnā tez thā jo ab mansūkh hai <sup>8</sup> to kyā Rūh ke nizām kā jalāl is se kahīn zyādā nahīn hogā? <sup>9</sup> Agar purānā nizām jo hameñ mujrim ṭahrātā thā jalālī thā to phir nayā nizām jo hameñ rāstbāz qarār detā hai kahīn zyādā jalālī hogā. <sup>10</sup> Hāñ, pahle nizām kā jalāl nae nizām ke zabardast jalāl kī nisbat kuchh bhī nahīn hai. <sup>11</sup> Aur agar us purāne nizām kā jalāl bahut thā

jo ab mansūkh hai to phir us nae nizām kā jalāl kahīn zyādā hogā jo qāym rahegā.

<sup>12</sup> Pas chūnki ham aisī ummīd rakhte haiñ is lie barī dilerī se khidmat karte haiñ. <sup>13</sup> Ham Mūsā kī mānind nahīn haiñ jis ne shariyat sunāne ke ikhtitām par apne chehre par niqāb dāl liyā tāki Isrāīlī use takte na raheñ jo ab mansūkh hai. <sup>14</sup> To bhī wuh zahñī taur par aṛ gae. Kyoñki āj tak jab purāne ahdnāme kī tilāwat kī jāti hai to yihī niqāb qāym hai. Āj tak niqāb ko haṭayā nahīn gayā kyoñki yih ahd sirf Masīh meñ mansūkh hotā hai. <sup>15</sup> Hāñ, āj tak jab Mūsā kī shariyat paṛhī jāti hai to yih niqāb un ke dilon par paṛā rahtā hai. <sup>16</sup> Lekin jab bhī koī Khudāwand kī taraf rujū kartā hai to yih niqāb haṭayā jāta hai, <sup>17</sup> kyoñki Khudāwand Rūh hai aur jahāñ Khudāwand kā Rūh hai wahāñ āzādī hai. <sup>18</sup> Chunāñche ham sab jin ke chehron se niqāb haṭayā gayā hai Khudāwand kā jalāl mun'akis karte aur qadam baqadam jalāl pāte hue Masīh kī sūrat meñ badalte jāte haiñ. Yih Khudāwand hī kā kām hai jo Rūh hai.

## 4

### *Miṭṭī ke Bartanon meñ Ruhānī Khazānā*

<sup>1</sup> Pas chūnki hameñ Allāh ke rahm se yih khidmat sauñpī gaī hai is lie ham bedil nahīn ho jāte. <sup>2</sup> Ham ne chhupī huī sharmnāk bāteñ mustarad kar dī haiñ. Na ham chālākī se kām karte, na Allāh ke kalām meñ tahrīf karte haiñ. Balki hameñ apñī sifārish kī zarūrat bhī nahīñ, kyoñki jab ham Allāh ke huzūr logoñ par haqīqat ko zāhir karte haiñ to hamārī neknāmī

ḳhud baḳhud har ek ke zamīr par zāhir ho jāti hai. <sup>3</sup> Aur agar hamārī ḳhushḳhabrī niqāb tale chhupī huī bhī ho to wuh sirf un ke lie chhupī huī hai jo halāk ho rahe haiñ. <sup>4</sup> Is jahān ke sharīr Ḳhudā ne un ke zahnoñ ko andhā kar diyā hai jo īmān nahīn rakhte. Is lie wuh Allāh kī ḳhushḳhabrī kī jalālī raushnī nahīn dekh sakte. Wuh yih paighām nahīn samajh sakte jo Masīh ke jalāl ke bāre meñ hai, us ke bāre meñ jo Allāh kī sūrat hai. <sup>5</sup> Kyoñki ham apnā prachār nahīn karte balki Īsā Masīh kā paighām sunāte haiñ ki wuh Ḳhudāwand hai. Apne āp ko ham Īsā kī ḳhātir āp ke ḳhādīm qarār dete haiñ. <sup>6</sup> Kyoñki jis Ḳhudā ne farmāyā, “Andhere meñ se raushnī chamke,” us ne hamāre diloñ meñ apnī raushnī chamakne dī tāki ham Allāh kā wuh jalāl jān leñ jo Īsā Masīh ke chehre se chamaktā hai.

<sup>7</sup> Lekin ham jin ke andar yih ḳhazānā hai ām miṭṭī ke bartanoñ kī mānind haiñ tāki zāhir ho ki yih zabardast quwwat hamārī taraf se nahīn balki Allāh kī taraf se hai. <sup>8</sup> Log hameñ chāron taraf se dabāte haiñ, lekin koī hameñ kuchal kar ḳhatm nahīn kar saktā. Ham uljhan meñ paṛ jāte haiñ, lekin ummīd kā dāman hāth se jāne nahīn dete. <sup>9</sup> Log hameñ izā dete haiñ, lekin hameñ akelā nahīn chhoṛā jātā. Logoñ ke dhakkoñ se ham zamīn par gir jāte haiñ, lekin ham tabāh nahīn hote. <sup>10</sup> Har waqt ham apne badan meñ Īsā kī maut lie phirte haiñ tāki Īsā kī zindagi bhī hamāre badan meñ zāhir ho jāe. <sup>11</sup> Kyoñki har waqt hameñ zindā hālat meñ Īsā kī ḳhātir maut ke hawāle kar diyā jātā hai tāki



us kī zindagī hamāre fānī badan meñ zāhir ho jāe. <sup>12</sup> Yoñ ham meñ maut kā asar kām kartā hai jabki āp meñ zindagī kā asar.

<sup>13</sup> Kalām-e-muqaddas meñ likhā hai, “Maiñ imān lāyā aur is lie bolā.” Hameñ imān kā yihī Rūh hāsil hai is lie ham bhī imān lāne kī wajah se bolte haiñ. <sup>14</sup> Kyoñki ham jānte haiñ ki jis ne Ḳhudāwand Īsā ko murdoñ meñ se zindā kar diyā hai wuh Īsā ke sāth hameñ bhī zindā karke āp logoñ samet apne huzūr khaṛā karegā. <sup>15</sup> Yih sab kuchh āp ke fāyde ke lie hai. Yoñ Allāh kā fazl āge baṛhte baṛhte mazīd bahut-se logoñ tak pahuñch rahā hai aur natīje meñ wuh Allāh ko jalāl de kar shukrguzārī kī duāoñ meñ bahut izāfā kar rahe haiñ.

### *Imān kī Zindagī*

<sup>16</sup> Isī wajah se ham bedil nahīñ ho jāte. Beshak zāhirī taur par ham khatm ho rahe haiñ, lekin andar hī andar roz baroz hamārī tajdīd hotī jā rahī hai. <sup>17</sup> Kyoñki hamārī maujūdā musībat halkī aur pal-bhar kī hai, aur wuh hamāre lie ek aisā abadī jalāl paidā kar rahī hai jis kī nisbat maujūdā musībat kuchh bhī nahīñ. <sup>18</sup> Is lie ham dekhī huī chīzoñ par ghaur nahīñ karte balki andekhī chīzoñ par. Kyoñki dekhī huī chīzeñ ārizī haiñ, jabki andekhī chīzeñ abadī haiñ.

## 5

<sup>1</sup> Ham to jānte haiñ ki jab hamārī duniyāwī jhoñpṛī jis meñ ham rahte haiñ girāī jāegī to Allāh hameñ āsmān par ek makān degā, ek aisā abadī ghar jise insānī hāthoñ ne nahīñ banāyā

hogā. <sup>2</sup> Is lie ham is jhoñprī meñ karāhte haiñ aur āsmānī ghar pahan lene kī shadīd ārzū rakhte haiñ, <sup>3</sup> kyonki jab ham use pahan leñge to ham nange nahīñ pāe jāeñge. <sup>4</sup> Is jhoñprī meñ rahte hue ham bojh tale karāhte haiñ. Kyonki ham apnā fānī libās utārnā nahīñ chāhte balki us par āsmānī ghar kā libās pahan lenā chāhte haiñ tāki zindagī wuh kuchh nigal jāe jo fānī hai. <sup>5</sup> Allāh ne ḳhud hameñ is maqsad ke lie taiyār kiyā hai aur usī ne hameñ Rūhul-quds ko āne wāle jalāl ke baiāne ke taur par de diyā hai.

<sup>6</sup> Chunāñche ham hameshā hauslā rakhte haiñ. Ham jānte haiñ ki jab tak apne badan meñ rihāishpazīr haiñ us waqt tak Ḳhudāwand ke ghar se dūr haiñ. <sup>7</sup> Ham zāhirī chīzoñ par bharosā nahīñ karte balki īmān par chalte haiñ. <sup>8</sup> Hāñ, hamārā hauslā buland hai balki ham zyādā yih chāhte haiñ ki apne jismānī ghar se rawānā ho kar Ḳhudāwand ke ghar meñ raheñ. <sup>9</sup> Lekin khāh ham apne badan meñ hoñ yā na, ham isī koshish meñ rahte haiñ ki Ḳhudāwand ko pasand aeñ. <sup>10</sup> Kyonki lāzim hai ki ham sab Masīh ke taḳht-e-adālat ke sāmne hāzir ho jāeñ. Wahāñ har ek ko us kām kā ajr milegā jo us ne apne badan meñ rahte hue kiyā hai, ḳhāh wuh achchhā thā yā burā.

*Masīh ke wasīle se Hamārī Allāh ke sāth Dosti*

<sup>11</sup> Ab ham Ḳhudāwand ke ḳhauf ko jān kar logon ko samjhāne kī koshish karte haiñ. Ham to Allāh ke sāmne pūre taur par zāhir haiñ. Aur maiñ ummīd rakhtā hūñ ki ham āp ke zamīr ke sāmne bhī zāhir haiñ. <sup>12</sup> Kyā ham yih bāt karke dubārā apnī sifārish kar rahe haiñ? Nahīñ, āp

ko ham par faḡhr karne kā mauḡā de rahe haiñ tāki āp un ke jawāb meñ kuchh kah sakeñ jo zāhirī bāton par sheḡhī mārte aur dilī bāteñ nazarandāz karte haiñ. <sup>13</sup> Kyoñki agar ham beḡhud hue to Allāh kī ḡhātir, aur agar hosh meñ haiñ to āp kī ḡhātir. <sup>14</sup> Bāt yih hai ki Masīh kī muhabbat hameñ majbūr kar detī hai, kyoñki ham is natīje par pahuñch gae haiñ ki ek sab ke lie muā. Is kā matlab hai ki sab hī mar gae haiñ. <sup>15</sup> Aur wuh sab ke lie is lie muā tāki jo zindā haiñ wuh apne lie na jien balki us ke lie jo un kī ḡhātir muā aur phir jī uḡhā.

<sup>16</sup> Is wajah se ham ab se kisī ko bhī duniyāwī niḡāh se nahīñ deḡhte. Pahle to ham Masīh ko bhī is zāwiye se deḡhte the, lekin yih waqt guzar gayā hai. <sup>17</sup> Chunāñche jo Masīh meñ hai wuh nayā maḡhlūḡ hai. Purānī zindagī jātī rahī aur naī zindagī shurū ho gaī hai. <sup>18</sup> Yih sab kuchh Allāh kī taraf se hai jis ne Masīh ke wasīle se apne sāth hamārā mel-milāp kar liyā hai. Aur usī ne hameñ mel-milāp karāne kī ḡhidmat kī zimmedāri dī hai. <sup>19</sup> Is ḡhidmat ke taht ham yih paiḡhām sunāte haiñ ki Allāh ne Masīh ke wasīle se apne sāth duniyā kī sulah karāī aur logoñ ke gunāhoñ ko un ke zimme na lagāyā. Sulah karāne kā yih paiḡhām us ne hamāre sapurd kar diyā.

<sup>20</sup> Pas ham Masīh ke elchī haiñ aur Allāh hamāre wasīle se logoñ ko samjhātā hai. Ham Masīh ke wāste āp se minnat karte haiñ ki Allāh kī sulah kī peshkash ko ḡabūl karen tāki us kī āp ke sāth sulah ho jāe. <sup>21</sup> Masīh begunāh thā, lekin

Allāh ne use hamārī khātir gunāh ṭhahrāyā tāki hameñ us meñ rāstbāz qarār diyā jāe.

## 6

<sup>1</sup> Allāh ke hamk̄hidmat hote hue ham āp se minnat karte haiñ ki jo fazl āp ko milā hai wuh zāe na jāe. <sup>2</sup> Kyoñki Allāh farmātā hai, “Qabūliyat ke waqt main ne terī sunī, najāt ke dīn terī madad kī.” Suneñ! Ab qabūliyat kā waqt ā gayā hai, ab najāt kā dīn hai.

<sup>3</sup> Ham kisī ke lie bhī ṭhokar kā bāis nahīn bante tāki log hamārī k̄hidmat meñ nuqs na nikāl sakeñ. <sup>4</sup> Hāñ, hameñ sifārish kī zarūrat hī nahīn, kyoñki Allāh ke k̄hadim hote hue ham har hālat meñ apnī neknāmī zāhir karte haiñ: jab ham sabar se musibateñ, mushkilāt aur āfateñ bardāsht karte haiñ, <sup>5</sup> jab log hameñ mārte aur qaid meñ dālte haiñ, jab ham beqābū hujūmon kā sāmna karte haiñ, jab ham mehnat-mashaqqat karte, rāt ke waqt jāgte aur bhūke rahte haiñ, <sup>6</sup> jab ham apnī pākīzagī, ilm, sabar aur mehrbān sulūk kā izhār karte haiñ, jab ham Rūhul-quds ke wasīle se haqīqī muhabbat rakhte, <sup>7</sup> sachchī bāteñ karte aur Allāh kī qudrat se logon kī k̄hidmat karte haiñ. Ham apnī neknāmī is meñ bhī zāhir karte haiñ ki ham donoñ hāthon se rāstbāzī ke hathiyār thāme rakhte haiñ. <sup>8</sup> Ham apnī k̄hidmat jāri rakhte haiñ, chāhe log hamārī izzat karen chāhe be'izzatī, chāhe wuh hamārī burī riporṭ deñ chāhe achchhī. Agarche hamārī k̄hidmat sachchī hai, lekin log hameñ daḡhābāz qarār dete haiñ. <sup>9</sup> Agarche log hameñ jānte haiñ

to bhī hameñ nazarandāz kiyā jātā hai. Ham marte marte zindā rahte haiñ aur log hameñ mār mār kar qatl nahīñ kar sakte. <sup>10</sup> Ham ġham khā khā kar har waqt ḡhush rahte haiñ, ham ġharīb hālat meñ bahutoñ ko daulatmand banā dete haiñ. Hamāre pās kuchh nahīñ hai, to bhī hameñ sab kuchh hāsīl hai.

<sup>11</sup> Kurinthus ke azīzo, ham ne khul kar āp se bāt kī hai, hamārā dil āp ke lie kushādā ho gayā hai. <sup>12</sup> Jo jagah ham ne dil meñ āp ko dī hai wuh ab tak kam nahīñ huī. Lekin āp ke dilon meñ hamāre lie koī jagah nahīñ rahī. <sup>13</sup> Ab maiñ āp se jo mere bachche haiñ darkhāst kartā hūñ kī jawāb meñ hameñ bhī apne dilon meñ jagah deñ.

### *Ġhairmasīhī Asarāt se Ḡhabardār*

<sup>14</sup> Ġhairīmāndāron ke sāth mil kar ek jue tale zindagī na guzāreñ, kyonki rāstī kā nārāstī se kyā wāstā hai? Yā raushnī tārīkī ke sāth kyā tālluḡ rakh saktī hai? <sup>15</sup> Masīh aur Iblīs ke darmiyān kyā mutābiqat ho saktī hai? Ġmāndār kā ġhairīmāndār ke sāth kyā wāstā hai? <sup>16</sup> Allāh ke maḡdis aur butoñ meñ kyā ittafāḡ ho saktā hai? Ham to zindā Ḡhudā kā ghar haiñ. Allāh ne yoñ farmāyā hai,

“Maiñ un ke darmiyān sukūnat karūḡga aur un meñ phirūḡga.

Maiñ un kā Ḡhudā hūḡgā,  
aur wuh merī qaum hoḡge.”

<sup>17</sup> Chunāñche Rab farmātā hai,  
“Is lie un meñ se nikal āo  
aur un se alag ho jāo.

Kisī nāpāk chīz ko na chhūnā,  
to phir main tumheñ qabūl karūnga.  
18 Main tumhārā Bāp hūngā  
aur tum mere beṭe-beṭiyāñ hoge,  
Rab Qādir-e-mutlaq farmātā hai.”

## 7

1 Mere azīzo, yih tamām wāde ham se kie gae haiñ. Is lie āeñ, ham apne āp ko har us chīz se pāk-sāf karen jo jism aur rūh ko ālūdā kar detī hai. Aur ham Khudā ke khauf meñ mukammal taur par muqaddas banāne ke lie koshāñ raheñ.

### *Paulus kī Kḥushī*

2 Hameñ apne dil meñ jagah deñ. Na ham ne kisī se nāinsāfi kī, na kisī ko bigārā yā us se ghalat fāydā uṭhāyā. 3 Main yih bāt āp ko mujrim ṭhahrāne ke lie nahīñ kah rahā. Main āp ko pahle batā chukā hūñ ki āp hameñ itne azīz haiñ ki ham āp ke sāth marne aur jīne ke lie taiyār haiñ. 4 Is lie main āp se khul kar bāt kartā hūñ aur main āp par barā fakhr bhī kartā hūñ. Is nāte se mujhe pūrī tasallī hai, aur hamārī tamām musibatoñ ke bāwujūd merī kḥushī kī intahā nahīñ.

5 Kyonki jab ham Makiduniyā pahuñche to ham jism ke lihāz se ārām na kar sake. Musibatoñ ne hameñ har taraf se gher liyā. Dūsroñ kī taraf se jhagoñ se aur dil meñ tarah tarah ke ḍar se nipaṭnā paṛā. 6 Lekin Allāh ne jo dabe huoñ ko tasallī bakhshatā hai Titus ke āne se hamārī hauslā-afzāi kī. 7 Hamārā hauslā na sirf us ke āne se barh gayā balki un hauslā-afzā bātoñ se bhī jin se āp ne use tasallī dī. Us ne

hamen āp kī ārzū, āp kī āh-o-zārī aur mere lie āp kī sargarmī ke bāre men riport dī. Yih sun kar merī khushī mazīd baḥh gai.

<sup>8</sup> Kyonki agarche main ne āp ko apne khat se dukh pahuñchāyā to bhī main pachhtātā nahīn. Pahle to main khat likhne se pachhtāyā, lekin ab main dekhtā hūn ki jo dukh us ne āp ko pahuñchāyā wuh sirf ārizī thā <sup>9</sup> aur us ne āp ko taubā tak pahuñchāyā. Yih sun kar main ab khushī manātā hūn, is lie nahīn ki āp ko dukh uṭhānā paḥh hai balki is lie ki is dukh ne āp ko taubā tak pahuñchāyā. Allāh ne yih dukh apnī marzī pūrī karāne ke lie istemāl kiyā, is lie āp ko hamārī taraf se koī nuqsān na pahuñchā. <sup>10</sup> Kyonki jo dukh Allāh apnī marzī pūrī karāne ke lie istemāl kartā hai us se taubā paidā hotī hai aur us kā anjām najāt hai. Is men pachhtāne kī gunjāish hī nahīn. Is ke baraks duniyāwī dukh kā anjām maut hai. <sup>11</sup> Āp khud dekhen ki Allāh ke is dukh ne āp men kyā paidā kiyā hai: kitnī sanjīdagī, apnā difā karne kā kitnā josh, ghalat harkaton par kitnā ghussā, kitnā khauf, kitnī chāhat, kitnī sargarmī. Āp sazā dene ke lie kitne taiyār the! Āp ne har lihāz se sābit kiyā hai ki āp is muāmale men bequsūr haiñ.

<sup>12</sup> Ghaz, agarche main ne āp ko likhā, lekin maqsad yih nahīn thā ki ghalat harkateñ karne wāle ke bāre men likhūn yā us ke bāre men jis ke sāth ghalat kām kiyā gayā. Nahīn, maqsad yih thā ki Allāh ke huzūr āp par zāhir ho jāe ki āp hamāre lie kitne sargarm haiñ. <sup>13</sup> Yihī wajah hai ki hamārā hauslā baḥh gayā hai.

Lekin na sirf hamārī haoslā-afzāi huī hai balki ham yih dekh kar be'intahā ḡhush hue ki Titus kitnā ḡhush thā. Wuh kyon ḡhush thā? Is lie ki us kī rūh āp sab se tar-o-tāzā huī. <sup>14</sup> Us ke sāmne main ne āp par faḡhr kiyā thā, aur main sharmindā nahīn huā kyonki yih bāt durust sābit huī hai. Jis tarah ham ne āp ko hameshā sachchī bāteñ batāi haiñ usī tarah Titus ke sāmne āp par hamārā faḡhr bhī durust niklā. <sup>15</sup> Āp use nihāyat azīz haiñ kyonki wuh āp sab kī farmānbardārī yād kartā hai, ki āp ne ḡarte aur kāñpte hue use ḡhushāmdīd kahā. <sup>16</sup> Main ḡhush hūñ ki main har lihāz se āp par etamād kar saktā hūñ.

## 8

### *Yahūdiyā ke ḡharīboñ ke lie Hadiyā*

<sup>1</sup> Bhāiyō, ham āp kī tawajjuh us fazl kī taraf dilānā chāhte haiñ jo Allāh ne sūbā Makiduniyā kī jamātoñ par kiyā. <sup>2</sup> Jis musibat meñ wuh phañse hue haiñ us se un kī saḡht āzmāish huī. To bhī un kī be'intahā ḡhushī aur shadīd ḡhurbat kā natījā yih niklā ki unhoñ ne baḡī faiyāzdilī se hadiyā diyā. <sup>3</sup> Main gawāh hūñ ki jitnā wuh de sake utnā unhoñ ne de diyā balki is se bhī zyādā. Apnī hī taraf se <sup>4</sup> unhoñ ne baḡe zor se ham se minnat kī ki hameñ bhī Yahūdiyā ke muḡaddasīn kī ḡhidmat karne kā mauḡā deñ, ham bhī dene ke fazl meñ sharīk honā chāhte haiñ. <sup>5</sup> Aur unhoñ ne hamārī ummīd se kahīñ zyādā kiyā! Allāh kī marzī se un kā pahlā ḡadam yih thā ki unhoñ ne apne āp ko ḡhudāwand ke lie maḡhsūs kiyā. Un kā dūsrā ḡadam yih thā



ki unhoñ ne apne āp ko hamāre lie maḵsūs kiyā. <sup>6</sup> Is par ham ne Titus kī hauslā-afzāi kī ki wuh āp ke pās bhī hadiyā jamā karne kā wuh silsilā anjām tak pahuñchāe jo us ne shurū kiyā thā. <sup>7</sup> Āp ke pās sab kuchh kasrat se pāyā jātā hai, ḳhāh īmān ho, ḳhāh kalām, ilm, mukammal sargarmī yā ham se muhabbat ho. Ab is bāt kā ḳhayāl rakheñ ki āp yih hadiyā dene meñ bhī apnī kasīr daulat kā izhār kareñ.

<sup>8</sup> Merī taraf se yih koī hukm nahīñ hai. Lekin dūsroñ kī sargarmī ke pesh-e-nazar main āp kī bhī muhabbat parakh rahā hūñ ki wuh kitnī haqīqī hai. <sup>9</sup> Āp to jānte haiñ ki hamāre Ḳhudāwand Īsā Masīh ne āp par kaisā fazl kiyā hai, ki agarche wuh daulatmand thā to bhī wuh āp kī ḳhātir ḡharīb ban gayā tāki āp us kī ḡhurbat se daulatmand ban jāeñ.

<sup>10</sup> Is muāmale meñ merā mashwarā sunēñ, kyoñki wuh āp ke lie mufīd sābit hogā. Pichhle sāl āp pahlī jamāt the jo na sirf hadiyā dene lagī balki ise denā bhī chāhtī thī. <sup>11</sup> Ab use takmīl tak pahuñchāeñ jo āp ne shurū kar rakhā hai. Dene kā jo shauḳ āp rakhte haiñ wuh amal meñ lāyā jāe. Utnā deñ jitnā āp de sakeñ. <sup>12</sup> Kyoñki agar āp dene kā shauḳ rakhte haiñ to phir Allāh āp kā hadiyā us binā par qabūl karegā jo āp de sakte haiñ, us binā par nahīñ jo āp nahīñ de sakte.

<sup>13</sup> Kahne kā matlab yih nahīñ ki dūsroñ ko ārām dilāne ke bāis āp ḳhud musībat meñ paṛ jāeñ. Bāt sirf yih hai ki logoñ ke hālāt kuchh barābar hone chāhieñ. <sup>14</sup> Is waqt to āp ke pās bahut hai aur āp un kī zarūrat pūrī kar sakte haiñ. Bād meñ kisī waqt jab un ke pās bahut

hogā to wuh āp kī zarūrat bhī pūrī kar sakeṅge. Yoñ āp ke hālāt kuchh barābar raheṅge, <sup>15</sup> jis tarah kalām-e-muqaddas meñ bhī likhā hai, “Jis ne zyādā jamā kiyā thā us ke pās kuchh na bachā. Lekin jis ne kam jamā kiyā thā us ke pās bhī kāfī thā.”

*Titus aur Us ke Sāthī*

<sup>16</sup> Ḳhudā kā shukr hai jis ne Titus ke dil meñ wuhī josh paidā kiyā hai jo main āp ke lie rakhtā hūñ. <sup>17</sup> Jab ham ne us kī hauslā-afzāī kī ki wuh āp ke pās jāe to wuh na sirf is ke lie taiyār huā balki baṛā sargarm ho kar ḳhud baḳhud āp ke pās jāne ke lie rawānā huā. <sup>18</sup> Ham ne us ke sāth us bhāī ko bhej diyā jis kī ḳhidmat kī tārif tamām jamāteñ kartī haiñ, kyonki use Allāh kī ḳhushḳhabrī sunāne kī nemat milī hai. <sup>19</sup> Use na sirf āp ke pās jānā hai balki jamātoñ ne use muqarrar kiyā hai ki jab ham hadiye ko Yarūshalam le jāeṅge to wuh hamāre sāth jāe. Yoñ ham yih ḳhidmat adā karte waqt Ḳhudāwand ko jalāl deṅge aur apnī sargarmī kā izhār kareṅge.

<sup>20</sup> Kyonki us baṛe hadiye ke pesh-e-nazar jo ham le jāeṅge ham is se bachnā chāhte haiñ ki kisī ko ham par shak karne kā mauqā mile. <sup>21</sup> Hamārī pūrī koshish yih hai ki wuhī kuchh kareñ jo na sirf Ḳhudāwand kī nazar meñ durust hai balki insān kī nazar meñ bhī.

<sup>22</sup> Un ke sāth ham ne ek aur bhāī ko bhī bhej diyā jis kī sargarmī ham ne kāī mauqoñ par parkhī hai. Ab wuh mazīd sargarm ho gayā hai, kyonki wuh āp par baṛā etamād kartā hai.

<sup>23</sup> Jahān tak Titus kā tālluq hai, wuh merā sāthī

aur hamk̄hidmat hai. Aur jo bhāi us ke sāth haiñ unheñ jamātoñ ne bhejā hai. Wuh Masīh ke lie izzat kā bāis haiñ. <sup>24</sup> Un par apnī muhabbat kā izhār karke yih zāhir karen ki ham āp par kyon fakh̄r karte haiñ. Phir yih bāt K̄hudā kī dīgar jamātoñ ko bhī nazar āegī.

## 9

### *Muqaddasīn kī Madad*

<sup>1</sup> Asal mein is kī zarūrat nahīn ki main āp ko us kām ke bāre mein likhūn jo hameñ Yahūdīyā ke muqaddasīn kī k̄hidmat mein karnā hai. <sup>2</sup> Kyonki main āp kī garmjoshī jāntā hūn, aur main Makiduniyā ke imāndāroñ ke sāmne āp par fakh̄r kartā rahā hūn ki “Akhayā ke log pichhle sāl se dene ke lie taiyār the.” Yon āp kī sargarmī ne zyādātar logoñ ko k̄hud dene ke lie ubhārā. <sup>3</sup> Ab main ne in bhāiyon ko bhej diyā hai tāki hamārā āp par fakh̄r bebuniyād na nikle balki jis tarah main ne kahā thā āp taiyār raheñ. <sup>4</sup> Aisā na ho ki jab main Makiduniyā ke kuchh bhāiyon ko sāth le kar āp ke pās pahuñchūngā to āp taiyār na hūn. Us waqt main, balki āp bhī sharmindā hoñge ki main ne āp par itnā etamād kiya hai. <sup>5</sup> Is lie main ne is bāt par zor denā zarūrī samjhā ki bhāi pahle hī āp ke pās ā kar us hadiye kā intazām karen jis kā wādā āp ne kiya hai. Kyonki main chāhtā hūn ki mere āne tak yih hadiyā jamā kiya gayā ho aur aisā na lage jaisā ise mushkil se āp se nikālnā parā. Is ke bajāe āp kī sak̄hāwat zāhir ho jāe.

<sup>6</sup> Yād rahe ki jo shaḡhs bīj ko bachā bachā kar botā hai us kī fasal bhī utnī kam hogī. Lekin jo bahut bīj botā hai us kī fasal bhī bahut zyādā hogī. <sup>7</sup> Har ek utnā de jitnā dene ke lie us ne pahle apne dil meñ ṭhahrā liyā hai. Wuh is meñ taklīf yā majbūrī mahsūs na kare, kyonki Allāh us se muhabbat rakhtā hai jo ḡhushī se detā hai. <sup>8</sup> Aur Allāh is qābil hai ki āp ko āp kī zarūriyāt se kahīñ zyādā de. Phir āp ke pās har waqt aur har lihāz se kāfī hogā balki itnā zyādā ki āp har qism kā nek kām kar sakeṅge. <sup>9</sup> Chunāñche kalām-e-muḡaddas meñ yih bhī likhā hai, “Us ne faiyāzī se zarūratmandon meñ ḡhairāt bikher dī, us kī rāstbāzī hameshā tak qāym rahegī.” <sup>10</sup> Ḳhudā hī bīj bone wāle ko bīj muhaiyā kartā aur use khāne ke lie roṭī detā hai. Aur wuh āp ko bhī bīj de kar us meñ izāfā karegā aur āp kī rāstbāzī kī fasal ugne degā. <sup>11</sup> Hāñ, wuh āp ko har lihāz se daulatmand banā degā aur āp har mauqe par faiyāzī se de sakeṅge. Chunāñche jab ham āp kā hadiyā un ke pās le jāeṅge jo zarūratmand haiñ to wuh Ḳhudā kā shukr kareṅge. <sup>12</sup> Yoñ āp na sirf muḡaddasīn kī zarūriyāt pūrī kareṅge balki wuh āp kī is ḡhidmat se itne muta'assir ho jāeṅge ki wuh baḡe josh se Ḳhudā kā bhī shukriyā adā kareṅge. <sup>13</sup> Āp kī ḡhidmat ke natīje meñ wuh Allāh ko jalāl deṅge. Kyonki āp kī un par aur tamām īmāndāron par saḡhāwat kā izhār sābit karegā ki āp Masīh kī ḡhushḡhabrī na sirf taslīm karte haiñ balki us ke tābe bhī rahte haiñ. <sup>14</sup> Aur jab wuh āp ke lie duā kareṅge to āp ke ārzūmand raheṅge, is lie ki Allāh ne āp ko kitnā baḡā fazl de diyā hai. <sup>15</sup> Allāh kā us kī

nāqābil-e-bayān baḳhshish ke lie shukr ho!

## 10

### *Paulus Apnī Ḳhidmat kā Difā Kartā Hai*

<sup>1</sup> Maiñ āp se apīl kartā hūñ, maiñ Paulus jis ke bāre meñ kahā jātā hai ki maiñ āp ke rūbarū ājiz hotā hūñ aur sirf āp se dūr ho kar diler hotā hūñ. Masīh kī halīmī aur narmī ke nām meñ <sup>2</sup> maiñ āp se minnat kartā hūñ ki mujhe āp ke pās ā kar itnī dilerī se un logoñ se nīpaṭnā na paṛe jo samajhte haiñ ki hamārā chāl-chalan duniyāwī hai. Kyoñki filhāl aisā lagtā hai ki is kī zarūrat hogī. <sup>3</sup> Beshak ham insān hī haiñ, lekin ham duniyā kī tarah jang nahīñ laṛte. <sup>4</sup> Aur jo hathiyār ham is jang meñ istemāl karte haiñ wuh is duniyā ke nahīñ haiñ, balki unheñ Allāh kī taraf se qile ḍhā dene kī quwwat ḥāsīl hai. In se ham ḡhalat ḳhayālāt ke ḍhāñche <sup>5</sup> aur har ūñchī chīz ḍhā dete haiñ jo Allāh ke ilm-o-irfān ke ḳhilāf kharī ho jātī hai. Aur ham har ḳhayāl ko qaid karke Masīh ke tābe kar dete haiñ. <sup>6</sup> Hāñ, āp ke pūre taur par tābe ho jāne par ham har nāfarmānī kī sazā dene ke lie taiyār hoñge.

<sup>7</sup> Āp sirf zāhirī bātoñ par ḡhaur kar rahe haiñ. Agar kisī ko is bāt kā etamād ho ki wuh Masīh kā hai to wuh is kā bhī ḳhayāl kare ki ham bhī usī kī tarah Masīh ke haiñ. <sup>8</sup> Kyoñki agar maiñ us iḳhtiyār par mazīd faḳhr bhī karūñ jo Ḳhudāwand ne hameñ diyā hai to bhī maiñ sharmindā nahīñ hūngā. Ḡhaur kareñ ki us ne hameñ āp ko ḍhā dene kā nahīñ balki āp kī ruhānī tāmīr karne kā iḳhtiyār diyā hai. <sup>9</sup> Maiñ

nahīn chāhtā ki aisā lage jaise main āp ko apne khaton se darāne kī koshish kar rahā hūn. <sup>10</sup> Kyonki bāz kahte haiñ, “Paulus ke khat zordār aur zabardast haiñ, lekin jab wuh khud hāzir hotā hai to wuh kamzor aur us ke bolne kā tarz hiqāratāmez hai.” <sup>11</sup> Aise log is bāt kā khayāl karen ki jo bāteñ ham āp se dūr hote hue apne khaton meñ pesh karte haiñ unhīn bāton par ham amal karenge jab āp ke pās āenge.

<sup>12</sup> Ham to apne āp ko un meñ shumār nahīn karte jo apnī tārīf karke apnī sifārish karte rahte haiñ, na apnā un ke sāth muwāzanā karte haiñ. Wuh kitne besamajh haiñ jab wuh apne āp ko meyar banā kar usī par apne āp ko jānchte haiñ aur apnā muwāzanā apne āp se karte haiñ. <sup>13</sup> Lekin ham munāsib had se zyādā faḥr nahīn karenge balki sirf us had tak jo Allāh ne hamāre lie muqarrar kiyā hai. Aur āp bhī is had ke andar ā jāte haiñ. <sup>14</sup> Is meñ ham munāsib had se zyādā faḥr nahīn kar rahe, kyonki ham to Masīh kī khushkhabrī le kar āp tak pahunch gae haiñ. Agar aisā na hotā to phir aur bāt hotī. <sup>15</sup> Ham aise kām par faḥr nahīn karte jo dūsron kī mehnat se saranjām diyā gayā hai. Is meñ bhī ham munāsib haddon ke andar rahte haiñ, balki ham yih ummīd rakhte haiñ ki āp kā imān barh jāe aur yon hamārī qadar-o-qimat bhī Allāh kī muqarrarā had tak barh jāe. Khudā kare ki āp meñ hamārā yih kām itnā barh jāe <sup>16</sup> ki ham Allāh kī khushkhabrī āp se āge jā kar bhī sunā sakeñ. Kyonki ham us kām par faḥr nahīn karnā chāhte jise dūsre kar chuke haiñ.

<sup>17</sup> Kalām-e-muqaddas meñ likhā hai, “Faḥr

karne wālā Ḳhudāwand hī par faḡhr kare.”<sup>18</sup> Jab log apnī tārīf karke apnī sifārish karte haiñ to is meñ kyā hai! Is se wuh saḡh sābit nahīn hote, balki aham bāt yih hai ki Ḳhudāwand hī is kī tasdīq kare.

## 11

### *Paulus aur Jhūṭe Rasūl*

<sup>1</sup> Ḳhudā kare ki jab main apnī hamāqat kā kuchh izhār kartā hūñ to āp mujhe bardāsht karen. Hāñ, zarūr mujhe bardāsht karen,<sup>2</sup> kyoñki main āp ke lie Allāh kī-sī ḡhairat rakhtā hūñ. Main ne āp kā rishtā ek hī mard ke sāth bāndhā, aur main āp ko pākdāman kuñwārī kī haisiyat se us mard Masīh ke huzūr pesh karnā chāhtā thā.<sup>3</sup> Lekin afsos, mujhe ḡar hai ki āp Hawwā kī tarah gunāh meñ gir jāenge, ki jis tarah sānp ne apnī chālākī se Hawwā ko dhokā diyā usī tarah āp kī soch bhī bigaṛ jāegī aur wuh ḡhulūsdilī aur pāk lagan ḡhatm ho jāegī jo āp Masīh ke lie maḡsūs karte haiñ.<sup>4</sup> Kyoñki āp ḡhushī se har ek ko bardāsht karte haiñ jo āp ke pās ā kar ek farq ḡism kā Īsā pesh kartā hai, ek aisā Īsā jo ham ne āp ko pesh nahīn kiyā thā. Aur āp ek aisī rūh aur aisī “Ḳhushḡhabrī” ḡabūl karte haiñ jo us Rūh aur ḡhushḡhabrī se bilkul farq hai jo āp ko ham se milī thī.

<sup>5</sup> Merā nahīn ḡhayāl ki main in nām-nihād ‘ḡhās’ rasūloñ kī nisbat kam hūñ.<sup>6</sup> Ho saktā hai ki main bolne meñ māhir nahīn hūñ, lekin yih mere ilm ke bāre meñ nahīn kahā jā saktā. Yih

ham ne āp ko sāf sāf aur har lihāz se dikhāyā hai.

<sup>7</sup> Main ne Allāh kī khushkhabrī sunāne ke lie āp se koī bhī muāwazā nā liyā. Yoñ main ne apne āp ko nīchā kar diyā tāki āp ko sarfarāz kar diyā jāe. Kyā is meñ mujh se ghaltī hui? <sup>8</sup> Jab main āp kī khidmat kar rahā thā to mujhe Khudā kī dīgar jamāton se paise mil rahe the, yānī āp kī madad karne ke lie main unheñ lūṭ rahā thā. <sup>9</sup> Aur jab main āp ke pās thā aur zarūratmand thā to main kisī par bojh na banā, kyoñki jo bhāi Makiduniyā se āe unhoñ ne merī zarūriyāt pūrī kīñ. Māzī meñ main āp par bojh na banā aur āindā bhī nahīn banūngā. <sup>10</sup> Masīh kī us sachchāi kī qasam jo mere andar hai, Aḡhayā ke pūre sūbe meñ koī mujhe is par faḡhr karne se nahīn rokegā. <sup>11</sup> Main yih kyoñ kah rahā hūñ? Is lie ki main āp se muhabbat nahīn rakhtā? Khudā hī jāntā hai ki main āp se muhabbat rakhtā hūñ.

<sup>12</sup> Aur jo kuchh main ab kar rahā hūñ wuhī kartā rahūngā, tāki main nām-nihād rasūlon ko wuh mauqā na dūñ jo wuh dhūnd rahe haiñ. Kyoñki yihī un kā maqsad hai ki wuh faḡhr karke yih kah sakeñ ki wuh ham jaise haiñ. <sup>13</sup> Aise log to jhūṭe rasūl haiñ, dhokebāz mazdūr jinhoñ ne Masīh ke rasūlon kā rūp dhār liyā hai. <sup>14</sup> Aur kyā ajab, kyoñki Iblīs bhī nūr ke farishte kā rūp dhār kar ghūmtā-phirtā hai. <sup>15</sup> To phir yih baṛī bāt nahīn ki us ke chele rāstbāzī ke khādīm kā rūp dhār kar ghūmte-phirte haiñ. Un kā anjām un ke āmāl ke mutābiq hī hogā.

*Rasūl Hone kī Wajah se Paulus kī Īzārasānī*



16 Maiñ dubārā kahtā hūñ ki koī mujhe ahmaq na samjhe. Lekin agar āp yih socheñ bhī to kam az kam mujhe ahmaq kī haisiyat se qabūl kareñ tāki maiñ bhī thoṛā-bahut apne āp par faḡhr karūñ. 17 Asal meñ jo kuchh maiñ ab bayān kar rahā hūñ wuh Ḳhudāwand ko pasand nahīñ hai, balki maiñ ahmaq kī tarah bāt kar rahā hūñ. 18 Lekin chūñki itne log jismānī taur par faḡhr kar rahe haiñ is lie maiñ bhī faḡhr karūñga. 19 Beshak āp ḡhud itne dānishmand haiñ ki āp ahmaqoñ ko ḡhushī se bardāsht karte haiñ. 20 Hāñ, balki āp yih bhī bardāsht karte haiñ jab log āp ko ḡhulām banāte, āp ko lūṭte, āp se ḡhalat fāydā uṭhāte, naḡhre karte aur āp ko thappaṛ mārte haiñ. 21 Yih kah kar mujhe sharm ātī hai ki ham itne kamzor the ki ham aisā na kar sake.

Lekin agar koī kisī bāt par faḡhr karne kī jurrat kare (maiñ ahmaq kī-sī bāt kar rahā hūñ) to maiñ bhī utnī hī jurrat karūñga. 22 Kyā wuh Ibrānī haiñ? Maiñ bhī hūñ. Kyā wuh Isrāīlī haiñ? Maiñ bhī hūñ. Kyā wuh Ibrāhīm kī aulād haiñ? Maiñ bhī hūñ. 23 Kyā wuh Masīh ke ḡhādīm haiñ? (Ab to maiñ goyā beḡhud ho gayā hūñ ki is tarah kī bāteñ kar rahā hūñ!) Maiñ un se zyādā Masīh kī ḡhidmat kartā hūñ. Maiñ ne un se kahīñ zyādā mehnat-mashaqqat kī, zyādā dafā jel meñ rahā, mere zyādā saḡhtī se koṛe lagāe gae aur maiñ bār bār marne ke ḡhatroñ meñ rahā hūñ. 24 Mujhe Yahūdiyoñ se pāñch dafā 39 koṛoñ kī sazā milī hai. 25 Tīn dafā Rōmiyoñ ne mujhe lāṭhī se mārā. Ek bār mujhe sangsār kiyā gayā. Jab maiñ samundar meñ safr

kar rahā thā to tīn martabā merā jahāz tabāh huā. Hāñ, ek dafā mujhe jahāz ke tabāh hone par ek pūrī rāt aur din samundar meñ guzārñā paṛā. <sup>26</sup> Mere beshumār safroṅ ke daurān mujhe kaī tarah ke khatroṅ kā sāmñā karnā paṛā, dariyāoṅ aur ḍākuoṅ kā khatrā, apne hamwatanōṅ aur Ghairyahūdiyoṅ ke hamloṅ kā khatrā. Jahāñ bhī maiñ gayā hūñ wahāñ yih khatre maujūd rahe, khāh maiñ shahr meñ thā, khāh ghairābād ilāḡe meñ yā samundar meñ. Jhūte bhāiyōṅ kī taraf se bhī khatre rahe haiñ. <sup>27</sup> Maiñ ne jāñfishāñī se saḡht mehnat-mashaqqat kī hai aur kaī rāt jāgtā rahā hūñ, maiñ bhūkā aur pyāsā rahā hūñ, maiñ ne bahut roze rakhe haiñ. Mujhe sardī aur nangepan kā tajrabā huā hai. <sup>28</sup> Aur yih un fikroṅ ke alāwā hai jo maiñ Kḡudā kī tamām jamātoṅ ke lie mahsūs kartā hūñ aur jo mujhe dabātī rahtī haiñ. <sup>29</sup> Jab koī kamzor hai to maiñ apne āp ko bhī kamzor mahsūs kartā hūñ. Jab kisī ko ghalat rāh par lāyā jātā hai to maiñ us ke lie shadīd ranjish mahsūs kartā hūñ.

<sup>30</sup> Agar mujhe faḡhr karnā paṛe to maiñ un chīzoṅ par faḡhr karūñgā jo merī kamzor hālat zāhir kartī haiñ. <sup>31</sup> Hamārā Kḡudā aur Kḡudāwand Īsā kā Bāp (us kī hamd-o-sanā abad tak ho) jāñtā hai kī maiñ jhūṭ nahīñ bol rahā. <sup>32</sup> Jab maiñ Damishḡ Shahr meñ thā to bādshāh Aritās ke gawarnar ne shahr ke tamām darwāzoṅ par apne pahredār muḡarrar kie tāki wuh mujhe giriftār karen. <sup>33</sup> Lekin shahr kī fasīl meñ ek darīchā thā, aur mujhe ek ṭokre meñ rakh kar wahāñ se utārā gayā. Yoṅ maiñ us ke

hāthoñ se bach niklā.

## 12

### *Paulus par Kai Bāton kā Inkishāf*

<sup>1</sup> Lāzim hai ki maiñ kuchh aur faḡhr karūñ. Agarche is kā koī fāydā nahīñ, lekin ab maiñ un royāoñ aur inkishāfāt kā zikr karūñga jo Ḳhudāwand ne mujh par zāhir kie. <sup>2</sup> Maiñ Masīh meñ ek ādmī ko jāntā hūñ jise chaudah sāl hue chhīn kar tīsre āsmān tak pahuñchāyā gayā. Mujhe nahīñ patā ki use yih tajrabā jism meñ yā is ke bāhar huā. Ḳhudā jāntā hai. <sup>3</sup> Hāñ, Ḳhudā hī jāntā hai ki wuh jism meñ thā yā nahīñ. Lekin yih maiñ jāntā hūñ <sup>4</sup> ki use chhīn kar firdaus meñ lāyā gayā jahāñ us ne nāqābil-e-bayān bāteñ sunīñ, aisī bāteñ jin kā zikr karnā insān ke lie rawā nahīñ. <sup>5</sup> Is qism ke ādmī par maiñ faḡhr karūñga, lekin apne āp par nahīñ. Maiñ sirf un bātoñ par faḡhr karūñga jo merī kamzor hālat ko zāhir kartī haiñ. <sup>6</sup> Agar maiñ faḡhr karnā chāhtā to is meñ ahmaq na hotā, kyonki maiñ haqīqat bayān kartā. Lekin maiñ yih nahīñ karūñga, kyonki maiñ chāhtā hūñ ki sab kī mere bāre meñ rāy sirf us par munhasir ho jo maiñ kartā yā bayān kartā hūñ. Koī mujhe is se zyādā na samjhe.

<sup>7</sup> Lekin mujhe in ālā inkishāfāt kī wajah se ek kāñṭā chubho diyā gayā, ek taklīfdeh chīz jo mere jism meñ dhañsī rahtī hai tāki maiñ phūl na jāūñ. Iblīs kā yih paighambar mere mukke mārtā rahtā hai tāki maiñ maḡhrūr na ho jāūñ. <sup>8</sup> Tīn bār maiñ ne Ḳhudāwand se

iltijā kī ki wuh ise mujh se dūr kare. <sup>9</sup> Lekin us ne mujhe yihī jawāb diyā, “Merā fazl tere lie kāfī hai, kyonki merī qudrat kā pūrā izhār terī kamzor hālat hī meñ hotā hai.” Is lie main mazīd khushī se apnī kamzoriyon par fakhr karūnga tāki Masīh kī qudrat mujh par thahrī rahe. <sup>10</sup> Yihī wajah hai ki main Masīh kī khātir kamzoriyon, gāliyon, majbūriyon, izārasāniyon aur pāreshāniyon meñ khush hūn, kyonki jab main kamzor hotā hūn tab hī main tāqatwar hotā hūn.

### *Paulus kī Kurinthyon ke lie Fikr*

<sup>11</sup> Main bewuqūf ban gayā hūn, lekin āp ne mujhe majbūr kar diyā hai. Chāhie thā ki āp hī dūsron ke sāmne mere haq meñ bāt karte. Kyonki beshak main kuchh bhī nahīn hūn, lekin in nām-nihād khās rasūlon ke muqābale meñ main kisī bhī lihāz se kam nahīn hūn. <sup>12</sup> Jo muta'addid ilāhī nishān, mojize aur zabardast kām mere wasīle se hue wuh sābit karte haiñ ki main rasūl hūn. Hāñ, wuh barī sābitqadmī se āp ke darmiyān kie gae. <sup>13</sup> Jo khidmat main ne āp ke darmiyān kī, kyā wuh Khudā kī dīgar jamāton meñ merī khidmat kī nisbat kam thī? Hargiz nahīn! Is meñ farq sirf yih thā ki main āp ke lie mālī bojh na banā. Mujhe muāf karen agar mujh se is meñ ghaltī huī hai.

<sup>14</sup> Ab main tīsri bār āp ke pās āne ke lie taiyār hūn. Is martabā bhī main āp ke lie bojh kā bāis nahīn banūngā, kyonki main āp kā māl nahīn balki āp hī ko chāhtā hūn. Ākhir bachchon ko mān-bāp kī madad ke lie māl jamā nahīn karnā chāhie balki mān-bāp ko bachchon ke lie.

<sup>15</sup> Main to barī khushī se āp ke lie har kharchā uṭhā lūngā balki apne āp ko bhī kharch kar dūngā. Kyā āp mujhe kam pyār karenge agar main āp se zyādā muhabbat rakhūn?

<sup>16</sup> Thīk hai, main āp ke lie bojh na banā. Lekin bāz sochte haiñ ki main chālāk hūñ aur āp ko dhoke se apne jāl meñ phansā liyā. <sup>17</sup> Kis tarah? Jin logoñ ko main ne āp ke pās bhejā kyā main ne un meñ se kisī ke zariye āp se ghalat fāydā uṭhāyā? <sup>18</sup> Main ne Titus kī hauslā-afzāī kī ki wuh āp ke pās jāe aur dūsre bhāī ko bhī sāth bhej diyā. Kyā Titus ne āp se ghalat fāydā uṭhāyā? Hargiz nahīn! Kyoñki ham donoñ ek hī rūh meñ ek hī rāh par chalte haiñ.

<sup>19</sup> Āp kāfī der se soch rahe hoñge ki ham āp ke sāmne apnā difā kar rahe haiñ. Lekin aisā nahīn hai balki ham Masīh meñ hote hue Allāh ke huzūr hī yih kuchh bayān kar rahe haiñ. Aur mere azīzo, jo kuchh bhī ham karte haiñ ham āp kī tāmīr karne ke lie karte haiñ. <sup>20</sup> Mujhe ḍar hai ki jab main āūngā to na āp kī hālat mujhe pasand āegī, na merī hālat āp ko. Mujhe ḍar hai ki āp meñ jhagarā, hasad, ghussā, khudgharzī, buhtān, gapbāzī, ghurūr aur betartībī pāī jāegī. <sup>21</sup> Hāñ, mujhe ḍar hai ki aglī dafā jab āūngā to Allāh mujhe āp ke sāmne nīchā dikhāegā, aur main un bahutoñ ke lie gham khāūngā jinhoñ ne mazī meñ gunāh karke ab tak apnī nāpākī, zinākārī aur aiyāshī se taubā nahīn kī.

## 13

*Ākhirī Tambīh aur Salām*

<sup>1</sup> Ab main tīsrī dafā āp ke pās ā rahā hūn. Kalām-e-muqaddas ke mutābiq lāzim hai ki har ilzām kī tasdīq do yā tīn gawāhoñ se kī jāe. <sup>2</sup> Jab main dūsrī dafā āp ke pās āyā thā to main ne pahle se āp ko āgāh kiyā thā. Ab main āp se dūr yih bāt dubārā kahtā hūn ki jab main wāpas āūngā to na wuh bacheñge jinhoñ ne pahle gunāh kiyā thā na dīgar log. <sup>3</sup> Jo bhī sabūt āp māng rahe haiñ ki Masīh mere zariye boltā hai wuh main āp ko dūngā. Āp ke sāth sulūk meñ Masīh kamzor nahīn hai. Nahīn, wuh āp ke darmiyān hī apnī quwwat kā izhār kartā hai. <sup>4</sup> Kyonki agarche use kamzor hālat meñ maslūb kiyā gayā, lekin ab wuh Allāh kī qudrat se zindā hai. Isī tarah ham bhī us meñ kamzor haiñ, lekin Allāh kī qudrat se ham āp kī khidmat karte waqt us ke sāth zindā haiñ. <sup>5</sup> Apne āp ko jānch kar mālūm karen ki kyā āp kā imān qāym hai? Khud apne āp ko parkheñ. Kyā āp nahīn jānte ki Īsā Masīh āp meñ hai? Agar nahīn to is kā matlab hotā ki āp kā imān nāmaqbul sābit hotā. <sup>6</sup> Lekin mujhe ummīd hai ki āp itnā pahchān leñge ki jahān tak hamārā tālluq hai ham nāmaqbul sābit nahīn hue haiñ. <sup>7</sup> Ham Allāh se duā karte haiñ ki āp se koī ghaltī na ho jāe. Bāt yih nahīn ki logoñ ke sāmne ham sahīh nikleñ balki yih ki āp sahīh kām karen, chāhe log hameñ khud nākām kyon na qarār den. <sup>8</sup> Kyonki ham haqīqat ke khilāf khare nahīn ho sakte balki sirf us ke haq meñ. <sup>9</sup> Ham khush haiñ jab āp tāqatwar haiñ go ham khud kamzor haiñ. Aur hamārī duā yih hai ki āp kāmīl ho jāeñ. <sup>10</sup> Yihī wajah hai ki main āp se dūr rah

kar likhtā hūn. Phir jab main āūngā to mujhe apnā iḳhtiyār istemāl karke āp par saḳhtī nahīn karnī paṛegī. Kyonki Ḳhudāwand ne mujhe yih iḳhtiyār āp ko ḍhā dene ke lie nahīn balki āp ko tāmīr karne ke lie diyā hai.

<sup>11</sup> Bhāiyo, āḳhir meñ main āp ko salām kahtā hūn. Sudhar jāen, ek dūsre kī hauslā-afzāi karen, ek hī soch rakhen aur sulah-salāmātī ke sāth zindagī guzāren. Phir muhabbat aur salāmātī kā Ḳhudā āp ke sāth hogā.

<sup>12</sup> Ek dūsre ko muḡaddas bosā denā. Tamām muḡaddasīn āp ko salām kahte haiñ.

<sup>14</sup> Ḳhudāwand Īsā Masīh kā fazl, Allāh kī muhabbat aur Rūhul-quds kī rifāqat āp sab ke sāth hotī rahe.

**Kitab-i Muqaddas**  
**The Holy Bible in Urdu, Urdu Geo Version, Roman**  
**Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

---

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30